



Vistu protesaun sira fó ba ema sira ne'ebé buka azilu

Hanesan nasaun barak, Austrália iha vistu sira hodi oferese protesaun ba ema sira ne'ebé buka azilu.

Vistu Protesaun (subklasse 866) permite ema ida ne'ebé iha risku réal atu hetan danu signifikativu ka persegisaun iha nia nasaun rasik atu bele hela iha Austrália permanentemente. Vistu Protesaun la'ós ba ema sira ne'ebé hakarak de'it hela kleur tan iha Austrália hodi serbisu.

Ita la bele aplika ba Vistu Protesaun se Ita iha Austrália nia li'ur. Ita tenke to'o ona iha Austrália ho vistu válidu no hetan ona autorizasaun husi imigrasaun iha momentu Ita to'o iha Austrália.

Halo ona mudansa boot sira ba prosesu aplikasaun ba vistu Protesaun hodi aselera tempu prosesamentu. Agora daudaun maioria husi aplikasaun foun sira hetan desizaun kuaze dala 8 lailais liu bainhira kompara ho tinan hirak ikus ne'e. Ida-ne'e signifika katak fó vistu Protesaun lailais liu ba ema sira ne'ebé presiza, no rejenta keda sira ne'ebé aplika ba vistu Protesaun tanba de'it hakarak serbisu ka hanaruk sira-nia tempu hela iha Austrália.

Keta aplika ba vistu Protesaun ida se Ita la presiza azilu iha Austrália. Ami rejenta lalais keda rekerente sira ne'ebé la prienxe kritériu hodi hetan vistu Protesaun.

Se Ita hanoin atu aplika ba vistu Protesaun (subklasse 866), ami enkoraja tebes Ita atu hetan konsellu legál gratuiitu (free legal help) husi forneseidór konsellu legál especialista kona-ba refujiadu no imigrasaun.

- [Prosesa vistu lailais liu](#)
- [Protesaun ne'e ba ema sira ne'ebé buka azilu](#)
- [Ajuda legál gratuita](#)
- [Ita-nia responsabilidade sira](#)
- [Restrisaun sira atu halo viajen](#)
- [Buka konsellu ne'ebé loos](#)
- [Tenke matan-moris ba operadór ilegál sira](#)
- [Se Ita-nia aplikasaun ba vistu Protesaun hetan rejenta](#)
- [Se Ita hela iha Austrália sein vistu válidu](#)
- [Opsaun sira seluk kona-ba vistu](#)
- [Asisténsia ho vistu ne'ebé atu remata](#)
- [Ajuda ho Ita-nia aplikasaun ba vistu](#)

Prosesa vistu lailais liu

Tuir mudansa foun sira ne'ebé governu introdús tiha ona, agora daudaun maioria husi aplikasaun foun sira ba vistu Protesaun (subklasse 866) hetan desizaun kuaze dala 8 lailais liu bainhira kompara ho tinan hirak ikus ne'e.

Se Ita la presiza protesaun iha Austrália, ka la prienxe kritériu ba vistu protesaun nian, Ita-nia aplikasaun sei hetan rejenta lailais liu.

Dala ruma iha vistu sira seluk ne'ebé apropiadu liu ba Ita-nia sirkunstánsia. Hodi buka vistu ne'ebé apropiadu ba Ita, konsidera Ita-nia opsaun sira ([Explore your options](#)).

Protesaun ne'e ba ema sira ne'ebé buka azilu

Vistu protesaun sira ne'e fó ba ema (ka sira-nia membru família) ne'ebé enfrenta risku réal atu hetan danu signifikativu se sira fila ba sira-nia rai ka iha possibilidade réal atu hetan persegisaun bazeia ba:

- rasa
- relijiaun
- nasionalidade
- sai membru iha grupu sosiál partikulár
- opiniaun polítika.

Atu aplika ba vistu Protesaun, Ita tenke iha Austrália nia laran ho vistu válidu no hetan ona autorizasaun liu husi imigrasaun iha momentu Ita to'o iha Austrália.

Keta aplika ba vistu Protesaun nu'udar meius hodi hanaruk Ita-nia tempu hela iha Austrália hodi asegura empregu ho pagamentu.

Aplikasaun ba vistu Protesaun ne'ebé rejentadu mak aas liu tebes duké número vistu ne'ebé fó-sai. Liu 85% husi aplikasaun sira hetan rejenta, tanba la prienxe rekizitu sira ba vistu ne'e. Aplikasaun sira husi nasionalidade balu kuaze 100% mak hetan rejenta.

Se Ita-nia aplikasaun ba vistu Protesaun hetan rejenta no Ita la iha vistu válidu, Ita tenke sai husi Austrália. Se Ita la iha vistu válidu, dala ruma bele hetan detensaun no hasai Ita husi Austrália.

Aplikasaun ba vistu Protesaun ne'ebé hetan rejenta sei mantein nafatin iha Ita-nia rejistu imigrasaun ba moris tomak. Ida ne'e mos bele halo susar liu ba Ita no Ita-nia família atu vizita Austrália iha futuru no bele fó impaktu sekarak Ita aplika ba vistu ba nasaun sira seluk iha futuru, depende ba vistu ida ne'ebé Ita aplika ba.

Bainhira Ita aplika ba vistu Protesaun, signifika Ita buka azilu iha Austrália husi Ita-nia nasaun rasik.

Se Ita aplika ba vistu Protesaun, Ita deklarata katak katak ida ka rua ne'e hotu husi buat sira tuir mai ne'e loos:

- Ita la bele fila ba Ita-nia rai sein enfrenta risku réal atu hetan danu signifikativu ka persegisaun;
- Ita nu'udar membru família husi ema ida ne'ebé halo reklamasaun sira hanesan ne'e.

Se Ita bele tama legalmente no hela seguramente iha nasaun seluk (alende Ita-nia nasaun rasik), Ita sei la hetan vistu Protesaun.

Tuir loloos Ita só bele aplika ba vistu Protesaun se Ita presiza azilu iha Austrália.

Lee liután kona-ba Austrália nia obrigasaun sira atu fó protesaun ([Australia's protection obligations](#)).

Ajuda legál gratuita

Se Ita hanoin atu aplika ba vistu Protesaun (subklasse 866), ami enkoraja tebes Ita atu hetan ajuda legál gratuitu husi forneseidór konsellu legál espesialista kona-ba refujiadu no imigrasaun iha Ita-nia estadu ka territóriu molok Ita aplika.

Lista forneseidór legál sira iha Ita-nia estadu ka territóriu

Estadu ka Territóriu	Naran	Website
Australian Capital Territory	Legal Aid ACT	www.legalaidact.org.au
New South Wales	Refugee Advice and Casework Service	www.racs.org.au
Northern Territory	Refugee Legal	www.refugeelegal.org.au
Queensland	Refugee and Immigration Legal Service	www.rails.org.au
South Australia	Legal Services Commission of SA	www.lsc.sa.gov.au
Tasmania	Tasmanian Refugee Legal Service	www.trls.org.au
Victoria	Refugee Legal	www.refugeelegal.org.au
Western Australia	Circle Green Community Legal	www.circlegreen.org.au

Forneseidór sira ne'e bele ajuda Ita:

- buka hatene se Ita elejivel ba vistu Protesaun ka vistu seluk ruma ne'ebé apropiadu liu
- komprende prosesu aplikasaun
- komprende implikasaun se Ita-nia vistu Protesaun hetan rejeita
- prienxe no entrega aplikasaun ba vistu Protesaun se nesésáriu.

Ita bele hetan mós ajuda legál gratuitu husi sentru asisténsia jurídika ka sentru legál komunitáriu iha Ita-nia estadu ka territóriu.

Ita-nia responsabilidade sira

Bainhira Ita entrega aplikasaun ba vistu Protesaun, Ita iha responsabilidade hodi garante katak informasaun hotu-hotu ne'ebé Ita fó ne'e loos no ezatu, maske ema seluk mak ajuda prienxe no entrega aplikasaun ne'e hodi Ita-nia naran.

La bele husik ema seluk aplika ba vistu Protesaun hodi Ita-nia naran sein komprende saida mak Ita aplika ba, no informasaun saida mak fó iha aplikasaun ne'e.

Komunidade sira ne'ebé hela iha Austrália iha papél importante atu prevene ema sira ne'ebé habelar informasaun sala ba ema sira ne'ebé konsidera atu aplika ba vistu Protesaun. Ida-ne'e inklui hasa'e ema sira seluk nia konxiénsia kona-ba risku sira bainhira entrega informasaun ne'ebé falsa ka inkorreta no uza asesór migrasaun ne'ebé la rejistadu.

Iha konsekuénsia séria bainhira fó informasaun ne'ebé falsa ka inkorreta ka dokumentu falsu sira iha aplikasaun ba vistu Protesaun, inklui multa boot, possibilidade atu hetan pena prizaun to'o tinan 10, ka pena rua ne'e hotu. Dala ruma mós susar liu ba Ita no Ita-nia família atu tama fali ba Austrália iha futuro, maske kaer hela vistu vizitante, vistu estudante, ka vistu serbisu temporáriu hanesan vistu rejime PALM ([PALM scheme visa](#)).

Se ema ruma ne'ebé aplika ba vistu Protesaun husu Ita atu hakerek karta ida ne'ebé fó apoiu ba nia, Ita só presiza halo ida-ne'e se Ita fiar katak nia enfrenta risku atu hetan danu signifikativu ka persegisaun se nia fila ba nia rain. Enkoraja sira atu asesá ajuda legál gratuitu ([free legal help](#)) husi fornecedor konsellu legál espesialista kona-ba refujiadu no imigrasaun iha sira-nia estadu ka territóriu.

Restrisaun sira atu halo viajen

Bainhira Ita aplika ba vistu Protesaun, Ita-nia aplikasaun bele hetan rejeita se Ita halo viajen ba nasaun ne'ebé Ita buka hela Austrália nia protesaun hasoru nasaun refere, maske Ita-nia família hela iha ne'ebá.

Se Ita hetan vistu Protesaun, Ita la bele halo viajen ba nasaun ida ne'ebé Ita husu ona azilu sein autorizasaun husi Governu Austrália, maske Ita-nia família hela iha ne'ebá.

Buka konsellu ne'ebé loos

Só bele husu konsellu kona-ba aplika ba vistu Protesaun husi ajente migrasaun sira ne'ebé rejistadu no profisionál jurídku Australianu sira. Ita bele mós husu asisténsia imigrasaun jerál husi ema izentu.

Ema izentu nu'udar ema ida ne'ebé la'ós ajente migrasaun ka profisionál jurídku no hanesan:

- ema ne'ebé nomeia Ita ka Ita-nia patrosinador
- Ita-nia membru família ne'ebé besik
- membru parlamentu
- membru husi misaun diplomátika
- membru husi postu konsulár
- membru husi organizasaun internasionál.

Ema ida ne'ebé la'ós ajente migrasaun rejistadu ka profisionál jurídku Australianu labele husu Ita selu kustu ba sira-nia ajuda. Ida ne konsidera ilegal ba ema izentu ne'ebé husu Ita selu kustu.

Ita bele verifika se ema ruma nu'udar ajente migrasaun rejistadu liuhosi buka informasaun iha rejistu online iha website [Office of the Migration Agents Registration Authority \(OMARA\) website](#), ka buka informasaun liután kona-ba oinsá bele hetan ajuda husi profisionál jurídku Australianu ([Australian legal practitioner](#))

Lee liután kona-ba sé mak bele ajuda Ita ho Ita-nia aplikasaun ba vistu ([who can help you with your application](#)) iha Austrália.

Buka informasaun kona-ba pasu sira hodi hili ajente migrasaun rejistadu ([steps to choose a registered migration agent](#)).

La bele husik ema seluk aplika ba vistu Protesaun hodi Ita-nia naran sein komprende saida mak Ita aplika ba, no informasaun saida mak fó iha aplikasaun ne'e. Ita tenke garante katak buat hotu iha Ita-nia aplikasaun ne'e loos, maske ema seluk mak prienxe no entrega aplikasaun ne'e hodi Ita-nia naran.

Tenke matan-moris ba operadór ilegál sira

Ne'e ilegál se ema ida husu Ita atu selu kustu ba konsellu migrasaun ne'e la'ós ajente migrasaun rejistadu ka profisionál jurídku Australianu. Iha risku Ita bele hetan konsellu inkorretu se Ita uza ema ida ne'ebé la'ós ajente migrasaun rejistadu ka advogadu Australianu, no mós iha risku ba Ita atu lakon possibilidade atu hela iha Austrália.

Operadór ilegál sira dala barak anunsia sira-nia servisu sira iha média sosiál no iha grupu chat sira online. Dala ruma sira fó-hatene rekerente sira atu fó informasaun falsa ka inkorreta ka atu fó dokumentu falsu sira bainhira aplika ba vistu Protesaun, no balu husu osan boot ba konsellu ne'ebé la korretu ne'e.

Se ema ruma koko atu fó asisténsia imigrasaun ba Ita ilegalmente, bele fó-hatene ami ho uza [Border Watch Online Report](#). Ita la presiza fó Ita-nia naran.

Se Ita-nia aplikasaun ba vistu Protesaun hetan rejeita

Se Ita-nia aplikasaun ba vistu Protesaun hetan rejeita:

- Ita tenke sai husi Austrália se Ita la iha vistu válidu
- bele susar liu ba Ita no Ita-nia família atu vizita Austrália iha futuru
- aplikasaun ne'ebé rejeitadu sei mantein nafatin iha Ita-nia rejistu imigrasaun ba moris tomak.
- bele fó impaktu ba Ita-nia aplikasaun ba vistu ba nasaun sira seluk iha Austrália nia li'ur iha futuru, depende ba tipu vistu ne'ebé Ita aplika ba.

Se Ita hela iha Austrália sein vistu válidu

Governu Austrália detein no hasai rekerente sira ho aplikasaun ba vistu Protesaun ne'ebé rejeitadu, ne'ebé agora laiha direitu atu hela iha Austrália. Atividade sira ne'e hodi implementa lei ajuda hodi mantein integridade sistema imigrasaun Austrália nian.

Se Ita hetan detensaun no hasai husi Austrália depoizde Ita-nia aplikasaun ba vistu Protesaun hetan rejeita, dala ruma Ita tenke selu fali kustu sira ne'ebé uza hodi hasai Ita husi Austrália. Kustu ne'e dala ruma bele to'o rihun ba rihun.

Opsaun sira seluk kona-ba vistu

Dala ruma iha vistu sira seluk ne'ebé apropiadu liu ba Ita-nia sirkunstánsia.

Hodi buka vistu ne'ebé apropiadu ba Ita, konsidera Ita-nia opsaun sira ([Explore your options](#)).

Asisténsia ho vistu ne'ebé atu remata

Atu buka hatene se Ita-nia vistu sei remata iha tempu badak ka remata ona, prienxe Ita-nia detalhe sira iha [Visa Entitlement Verification Online \(VEVO\)](#).

Ami-nia Servisu Rezolusaun Estatutu (Status Resolution Service - SRS) bele ajuda se Ita presiza asisténsia hodi rezolve Ita-nia kestaun imigrasaun sira. Ofisiál SRS sira bele:

- fó atensaun ba obstáculos ka barreira sira ne'ebé prevene rezolusaun ba Ita-nia kazu
- fó informasaun ne'ebé klaru kona-ba dalan imigrasaun sira ka opsaun sira atu sai
- fó bridging visas ba ema sira ne'ebé elejivel ne'ebé agora daudaun la iha vistu válidu

Buka informasaun liután iha Servisu Rezolusaun Estatutu ([Status Resolution Service](#)).

Ajuda ho Ita-nia aplikasaun ba vistu

Ami enkoraja tebes Ita atu buka ajuda legál gratuitu ([free legal help](#)) husi fornecedor konsellu legál espesialista kona-ba refujiadu no imigrasaun hodi hatene sekarak Ita elejivel ba vistu Protesaun.